



Dancha Bude Lossa

Leveled



Kuni irkisaanchu maxaafi ‘USAID’inni afi’nonni woxu irkonni ‘Save the Children’i, Rosu Ministerenna Wodiidi Daga Dagoominna Manni Qoqqowu Mangiste Rosu Biiro mittimmate sumiimmenni qixxaawe attamamino.

2009 M.D



USAID
FROM THE AMERICAN PEOPLE



Save the Children



The CC By license lets others distribute, adjust, and build upon this work, for free or commercially, as long as credit is given to the original creation. However, any changes from the original must be indicated.

For more info please refer: <https://creativecommons.org/licenses/>



Dancha Bude Lossa

Kifile 3

Lamala 25



Qaagiishsha

Aante shiqqino niwaawe (dhagge) illachishshannohu nabbawate huwato aanaati. Niwaawete albaanninna gedensaanni noo xa'mo dawartannota xawisatenni niwaawete mereero shiimare taxxi yitanni nabbabbinore xaphi assidhanno gede kaayyo uyiyyensa. Rosaano niwaawe nabbawate albaanni konni albaanni affinore kultanno gede xa'matenni jawaachishshensa. Konni garinni rosaanonnita niwaawe nabbawate hasatto kakkayissinihu gedensaanni niwaawe nabbawa hananfona. Rosaano irkissinanni baali, xa'muwa dawarate rosaano baala beeqqo assitanno gede jawaachishshensa. Uytanno dawarono haadhinanni taashshi'ri-tumo uyiyyensa.

Nabbawate Albiidi Xa'mo

1. Dancha budeeti yinannihu maa maati?
2. Busha budeeti yinannihu hiittoohoyya?
3. Jawa ayirrisate ooso ma"assitanno?



Dancha Bude

Itophiyaho addi addi daga no. Tini daga addi addi bude afidhino. Budu annu awurunni taraawanni techora iillino amanyooteeti. Mitu budi dancha budeeti. Mitu kayinni gawajjanno budeeti. Dancha bude seekkine lossinanni busha bude kayinni agura woy huna hasiissannonke.

Sidaamu daga Itophiyu giddo anfanni
daga giddo mitte dagaati. Sidaamu daga
uminsaha ikkinoha addi addi bude afidhino
dagaati. Daga baalante giddo danchu budinna
bushu budi no. Wole daga budi gede
Sidaamu daga giddono danchunna bushu
budi hee'rara dandaanno. Hanni mito mito
danchanna busha bude aanchine la'no.

Balanxe kayinni dancha ikkino bude la"ate
wo'naalleemmo. Sidaamu daga addi addiha
dancha bude afidhino. Hakkuri giddo
mittu wi'late budeeti. Sidaamu daga
giddo mannu reyro wi'linanni amanyooti
no. Reyiha madaarre shii'ri ayidde
sheshifachisha dancha budeeti. Shii'ri
ayidde sheshifachinshannihuno sagale qishe
toyatatenni, buna gafatenni, haqqe bocatenni,
waaratenninna hasaawisatenniiti.

Wolu danchu budi loosi'rate budeeti.
Sidaamu daga baatto loosidhannohu
amanyootu no. Sidaamu dagara minu
gateenni weese dihoogganno. Gideno yanna
agare loosi'ranno. Gideno ikko weese
loosi'nanni wogga no. Tenne wogga agare
dee eatenni, guto woy hojjinni loosi'rate
amanyooti no. Kunino dancha budeeti.

Wolu danchu budi mimmitu ledó kaa'lamate
budeeti. Mannu mimmitu ledó hee'ranno
woyite addi addi doogonni kaa'lamanno.
Mannu mine mi'nate, baatto loosi'rate,
qarramihura mimmitoho woxunni ti'rate
gaaggaaddaainikkinni ku'u ko'onne, ti'i
te'enne irkissanno budi no. Kuni budi
dancha bude ikkinohura albira hige jawaata
hasiissannosi budeeti.

Busha Bude

Danchu budi aleenni kayinsiha calla di'ikkino; woluno duuchu danchu budi hee'ranno. Danchu budi hee'rinte gede bushu budino hee'ranno. Bushu budi ikkado egenno hoongenni woy dancha lawe leelleenna assatenni albinni sufame xaa geeshsha iillino budeeti. Hanni xa mito mito busha budeeti yinanniha la'no.

Bushu budi giddo mittu qaaquulleho kokkericho murate budeeti. Qaaquulleho kokkericho darshitanno woyte baadi ogeessi kokkericho muranno. Baadilicho doogonni kokkericho murate horonsi'nanni udiinni co'icha ikkannokkihura qaaquullu aana dhibba kalaqanno.



Bushu budi giddo wole reyno mannira yine
baqqaalla huduuxxate. Bashsho yannara
mannu fiixa shii'riro roorinni meentu
baqqaalla huduuxxe madiissi'ranno. Mitu
meenti umonna afalcho ga'nannoha ikkana
mitu kayinni danancho cidhanno. Mitu
labballi hattonni umo billawunni ga'nanno.

Kuni assooti reyno manna galagale
kayisannoha di”ikkino. Noohurano
reyinohurano kaa’lannori mitturichino dino.
Lubbote nooha kayinni raantisatenni sae
dhiwamaancho assara dandaanno. Konni
daafira, mannaho heedhannonke mararro
umonke gawajjinummokkini xawisa
hasiissanno.

Bude ikka hoogirono hee’neemmo qarqarira
ganye leellannohu mitu mitu bushu akati
no. Hakkunno lawishshu gedera xonamate
akataati. Mimmitu ledi xonamanna jawa
xona busha amanyooteeti. Hajajama giwa
hattonni busha amanyooteeti. Illo anninna
ama woy ollichu manni soqqeenna soqama
giwa addintanni busha amanyooteeti.

Woleno busha ikkito qarqarinkera la'neemmo.
Jajjabbano oosono ikkituro mimmitu led
giwamano busha amanyooteeti. Mannu
mimmitu led hasaawe tidha agure Shiimu
coyinni mimmitu led giwamanna la'neemmo.
Oosono hattonni rosu mine, doogote woy
allaalenniwa doogiweelo mimmitu led
giwantanno. Tini ikkito busha amanyooteeti.

Konni daafi'ra, gibbote iillishannore
nafa ikkiro cincine mannaho qaxxadha
hasiissanno ikkinnina giwama dihasiissanno.
Aju akkali mimmitu led sumuu yee hee'ra lowo
kaa'lo afidhino.

Xaphoomunni mitte daga giddo danchunna
bushu budi hee'rannota la'noommo. Busha
bude hunne dancha bude kayinni lossi'ra
hasiissanno.

Ooso Jawa Ayirrissanno Bude

Konni albaanni danchanna busha bude bado badotenni la'noommo. Rooru danchu budi jajjabbu ha'runsitannoho. Ikkollana, oosono ayirrissannohu addi addihu danchu budi no. Kuri giddo aanchine ooso ayirrissannoha sase dancha bude la'neemmo.

Kuri mereerinni umo assine la'neemmohu ooso jawa ayirrissanno budeeti. Layinkimeeshshu deerrinni la'neemmohu ooso mimmitonsa ayirrissanno budeeti. jeefote la'neemmohu kayinni ooso saga'late amanyoote ayirrissanno budeeti. Kuri mitto mittonka bude ayirrinsanni garanna mayira ayirrisa hasiissannoro aane noo garinni la'neemmo.



Itophiyu daga baalati jawa ayirrissanno.
Sidaamu dagarano ooso jawa ayirrissanno
budi no. Jawaho yineemmohu oosote
darawonna ma'nuulle qaquulle aguranna
noore baalaati. Ooso lowo geeshsha
jajjabbanna bayiruuddensa ayirrinsanno gari
babbaxxanno. Ikkollana, jajjabbano ikko
bayiruuddensa ayirrinsanno budi no.

Coy gedera, jajjabbaho addi addi doogonni ayirrinye xawinsanni gari no. Sidaamu budinni doogo ha'nanni woyite jawa qolchine disa'nanni. Sa"a yorriro nafa fajjo xa'mine sa'nanni ikkinnina dangoonni gedeenni sa'ne diha'nanni. Sa'nannihuno boodere fanfe ikkinnina jawa riiqantanni di"ikkino.

Wole widoonni, doogo ha'nanni buusu noowa iilliniro jawu fulikkinni balanxe buusa difullanni. Xeerti're hee'riro nafa daye fula geeshsha buusu mule uurrine agarranni. Uurrine agarre hee'neenna jawu dayiro, "Ooso tu lophe!" yee maassi're sa"anno. Konni garinni ooso jawa ayirrissanninna maasso adhitanni lophitanno.


Ooso jajjabba ayirrissanno budi giddo wolurichi hajajamate. Jawu oosicho minihano gobbahano soqqanno. Jawu, “Ooso hakkune tee”enne saada kawa qolle; hakka buubbine amme; waa abbe”e; eweliwa dhaansa iillishshe”e,” yiirro “Maahoyye,” yite soqqantanni jajjabba manna ayirrissanno.

Ooso jawaho barcima ka’e uyitanno. Jawu coyi’ranna hi’ra e’anni mereeroho dicoyidhanno. Sagale itanno woyteno jawu sagale cu’me uyiirro adhitanno ikkinnina “Ani duuwoommo. Ani duuwoomma” yite tumo diqoltanno. Duubbino ikkiro nafu adhite gedenira wodhitanno woy woleho uyitanno.

Ooso Mimmito Ayirrissanno Bude

Wole Itophiyu daga gidde ooso mimmito ayirrissanno budi no. Hattono, Sidaamaho ooso mimmito ayirrissanno budi no. Ooso mimmito babbaxxino garinni ayirrissanno bude afidhino. Lawishshu gedera, ooso mimmitu ledi hasaabbanno woyte badi agadhite ku'u ko'onnita, ti'i te'enneta macciishshitanni hasaabbanno.

Qoleno, ooso mimmitu ledi godo'litannohu godo'lete budino noonsa. Mimmitu ledi godo'litanno woyte godo'lete bude agarte godo'litanno. Mite mite godo'lete gidde qeelanna qeelama heedhanno. Qeelantuha ikkiro nafa mimmitu ledi digiwantanno.



Oosote amanyooti gidde mittu lowo geeshsha danchu amanyooti no. Hakkuno, maa'nuullu bayiruuddinsara soqqantanno amanyooteti. Ma'nuullu bayiruuddinsa soqqantanno. Qoleno, bayiruuddinsa seejjo macciishshite adhitanno.

Ooso loossanno danchu assooti gidde hawa hasiissannokkiri mimmitoho nabbawisiisate

assooteeti. Ooso rosu mine rossinore
woy mannu coyi'ranna macciishshitinore
mimmitoho rosiissanno. Mini loosono
kaa'lantanni loossara dandiitanno. Kifilete
deerrinni aleenni noohu woroonni nooha
kaa'le loosiisanno yaate.

Ooso mimmitonsa ayirrissanni leellishshanno
budi gobbaanni olliinsa manniranno
leellishshannohu danchu budi no. Ooso
olliichoho addi addi assoote assitanni
soqqantanno. Olluu mannira waa dirritanno;
haqqe hiiqqitanno; saadano toyaattanno.
Konni garinni ooso leellishshanno assooti
lowo geeshsha danchaho.

Oosonniha Saga'late Amanyooto

Aye dagarano saga'linanni budi hee'ranno.
Saga'linanni yannara agadha hasiissanno
amanyooti noota hawa dihasiissanno.
Sidaamu budinni sagale lowo geeshsha
ayirradote. Sagale umiseha ikkinoha
saga'late amanyooto afidhino. Ooso sagale
ittanno woyite ayirrisannohu saga'late budi
no.

Hukkuno sagale intanni yannara assa
hasiissannoreenna assa hasiissannokkireeti.
Lawishshu gedera, sagale itate albaanni
anga hayishshi'ra hasiissanno. Mite yannara
anga hayishsh'ra hoongiro hogunnino
intara dandiinanni. Sagale intanni
hee'ne hasaanbanni canca dihasiissanno.
Sagaleno anfi gede assine uulla difincinanni
Saamamano disaamammanni.



Intanni duuwa hoongiro budunni xa'mine lende intanni. Duumbeenna gattanno sagale mullawa agurre diha'nanni; xaanxe woy dimbegarunni maanxanni. Sagale intoonni sayinenna waa angoonni woy ado qaammoonni kubbaayya hayishshine worranni.

Xaphoomunni, ooso saga'litanno woyite konne saga'late bude seekkite agara hasiissannonsa. Konne bude agadha hooggannoha ikkiro jawu, "Ooso baashaabbino," yee mishara dandaanno.

Nabbawate Gedensiidi Xa'mo

Biddissa : Aante shiqqino xa'mo niwaawete garinni dawari.

1. Busha budeeti yinanniri maa maati?
2. Busha amayooteeti yinannire kuli.
3. Ooso jawa ayirrisate maa maa assitanno?
4. Sagale saga'linanni woyte agadhinanniri maati?
5. Mimmito ayirrisa dancha budeeti yinannihu mayraati?

